

皇清文穎續編

皇清文穎續編卷二十八

頌

平定兩金川頌

謹序

孔廣森

臣

聞在天成象金精耀參伐之旗惟聖憲時雷

豫習行師之繇是以軒皇秉籙先修赤水之征

唐后垂裳必戢青邱之暴亦有周宣薄伐近在

太原殷武裒師不踰荆楚而三年有賞易以象

其成功千里來歸詩尙歌其永久方之今日靡

得而言焉我

皇上繼

聖御機貳

天立極文覃姒甸武憺金方建木以西鑿空萬里長  
榆而北列燧千城玉培輸琛戴勝款青牛之塞  
銅街闢邸呼韓覲白虎之廷雲呂十旬記里之  
車合軌鞮胥九譯菴幣之史同文幽遐畢屆其  
梯航泰遠咸歸乎幪幪而禹功不到西流自絕

於朝宗穢性難馴東徙仍迷於革嚮乃有兩金  
川者鼈令游魂犬搖餘孽化殊天外介熨微以  
稽誅俗遠華中比夜郎而自大粵在卯辰之歲  
會興戊己之師宥以投戈許其銜璧

恩寬罽社未封武觀之鯨鯢榮假分符俾禦危山之  
魑魅而乃狼心反噬鴟義矯虔不格兩階之干  
自投一面之網促浸逆酋索諾木負阻窺覲憑  
遐翻覆豨蛇薦食屢及於鄰疆蠻觸尋爭漸連

於內地攢拉逆酋僧格桑流湯黨惡握炭比姦  
外順內違每洩駒支之語高巢陞制擅詢句町  
之仇議者猶以天險不可升鞭長莫能及修五  
戎於鹿野亦緩前禽合萬玉於龕山非無後至  
時則

乾衷獨斷巽令重申謂將加以撫綏必且生其玩愒  
於是發兵城郭選士良家闕虎朝鋪人問沈黎  
之罪跼鳶夜渡衆爭敵愾之功師出一年月聞

三捷僧格桑弃地而遁小金川全境以降然而  
虎負隅閉困猶思鬪鷹栖鞬上飽卽背人此則  
因壘之師所以勞其再駕渡瀘之役必將示以  
七擒者也

聖天子昃晷思賢綸書策將益以八旗之甲卒副以  
七萃之期門爰

命阿桂爲定西將軍寄專閩之司受鑿門之律營平  
封奏羌罕料其成禽裴相視師淮蔡聞而悸魄

爾乃轆車雷動，鼓騎風趨。我旗我鼓，堂堂正正。  
以隆以衛，萋萋閑閑。朔簪燕弧，能穿七札。鞞章  
鷗幟，欲籌重雲。長殺扶身，戾角摧斑。之侶申驅，  
大殿投石，拔距之倫。指揮則屋瓦皆飛，叱咤則  
藩籬若朽。再平美諾，一掃荒陬。繫彼妻孥，降其  
部落。月氏已死，漆函傳飲器之頭。徵側爲俘，驛  
騎致蠻銅之鼓。惟是逆酋索諾木連，雖失勢知  
必及於

天誅鋌鹿已窮猶自恃其地利環山列柵背水施碇  
奮螳臂以當輪網螯絲而結衛山橫虎踞徑轉  
羊腸九折路艱刺史迴車之阪千尋壁立元侯  
束馬之峯我軍策銳長驅忘勞失險直衝曠弩  
不避槍雷堊父乘墉布再懸而再斷滑釐折箸  
械九設而九攻土載裹羶自踰劍閣文淵負羽  
獨進壺頭出三道以合圍若九天之下降遂以  
去年八月十五日破勒烏圍戈矛照月鶴鵝之



陣彌雄旆旆生風鴨鴛之聲盡亂賊等退奔刮  
耳仍不革心彘卵之勢益危丸泥之守益固

九重籌筆早制勝於氏羌三帥宣猷更分功於郤范  
火延板屋候箕壁之星高矢貫銅侯占丙丁之  
日剋礮起豐隆之響五尺道開鎗飛列缺之鞭  
雙甄隊整屢攻僧寺且震懼其祇神遂獲媿徒  
先係累其母妹我氣方銳破竹無頓刃之勞彼  
力已殫窳亦有丁衝之急幕危燕散鼎沸魚驚

方陳縛主之求始請吹堯之罪今年二月四日  
索諾木兄弟就禽羣醜旣俘脅從罔治誅非填  
服豈停睢水之流降者如歸不比陰山之失檻  
車執訊露版馳聞當赤囊驛報之時正

翠蓋臨行之地勛過獲嘉之改縣事向聞喜之名鄉  
天子展謁

兩陵奏膚

七廟靈臺上祭卽陳丹水之功畢郢登祠自兆素鱗

之慶善歸

聖母敬上

徽音奉

慈輦以豫遊遵翁河而哀對杏花菖葉兼省春耕茹  
水芹宮式迎秋

駕泰山玉莢探瑞算之無疆魯殿金絲告武成之有  
截旣而赤融司職朱陸移躔襄城迴

巡守之輿轡野振凱旋之旅條侯之屯細柳環甲冑

以來朝耿弇之在臨淄降乘輿而親勞然後有事

廟

社大獻俘囚秋官請纓夏卿執鉞歌騰鼓吹漢饒朱  
鸞之章樂被伶簫周雅彤弓之什誓河山而疏  
爵班通徹以酬庸辛李勣名咸開東第鄂褒毛  
髮並繪南宮赫赫乎

一人之聲靈煌煌乎千古之盛事不假銜鉤之后載

十一征豈惟通驛之邊餘四萬里東西鵝鶻並  
入黃圖規矩麒麟來瞻赤帟冉駹叩在交輸流  
沫之珍傑侏侏僞疊上提宮之詠賤錢歲納約  
無負於黃龍賚布時供信共申於白馬風雷不  
迅百神奉中國之靈海水無波三島識

聖人之治玉關偃革紫塞銷兵鶴膝羊頭仍入蘭鐙  
之庫龍文驥子散歸仙掌之山

皇威布矣

聖功昭矣，絲茲經緯，蓋咸五而登三，勒之簡編，將襲

六而爲七者已。

小臣

職忝螭坳，學慚豹管，聞西

師之耆定，均慶於並天，念東土之瞻

光感深於私渥，濡毫吮墨，徒懷睎尹之衷，測管闕

蠶莫罄揄揚之義，謹拜手稽首而獻頌曰

於鑠

上聖奄有下矩，併冒八埏，枕被九宇，象寄柔通，龜沙  
卽敘竒幹，善芳息慎，文啓東漸，日域西底，月戶孰有

不庭靖我疆土孰爲不譴膏我齊斧蠢彼促浸違順  
支拒葺爾趨拉助逆齟齬九姓內藩廿年外侮敢讐  
大邦侵擾西國邊吏上言

宸居赫怒秉節禍牙發璋徵琥桓桓定西國之強禦  
總領戎旆師干甄部青叟從行白徒束伍有獲斯應  
其矯如虎

睿慮周宣勝成廓廡署道披圖指形聚黍先翦美諾  
斷其唇輔進逼勒圍攻其腹脅爾險何依爾遠何怙

爾山我陵爾稱我稱  
縫革衝礪卦礪業炬  
破易撥烈動若摧陷  
羌豪帥醜刮耳是聚  
井底困蛙穴中鼠  
五雨振威重山夷阻  
季母旣禽精夫亦虜  
遂獲渠魁併建黨與  
戎庭分犁苗人安撫  
畏

天子威樹領伏俯戴

天子忍厥角率舞紅旗之捷奏

行在所讓德於

天告功於



祖武烈承謨達孝纘緒吉主上

陵明禋薦禱日罔重熙露甘零滑有冲

文思祇事

壽母

瓊冊述徽

璇宮秋祐

安輦蓋與洪艫清籟般賚協周祈沈觀滬水若恬流  
登祇順扈輯瑞岱宗陳風鳩渚惟

聖崇儲叶典自古淑問西序祭菜東魯芹藻肆筵黍  
稷在簠展采洋洋上儀駟駟

帝有詔言郊迎體旅青壇三陔緹帷重組獎勉戰多  
問慰勞苦昔奏采薇今歌杖杜飲至策勛列爵惟五  
榮以茅符申之裘黼韓錫綬章召釐圭和或籌帷幄  
亦折樽俎文相賢冠武臣大羽形繪雲臺聲垂銅柱  
偉矣隆碣禱而

天語寶墨龍轡雲章鳳舉紀迹峻嶮勒崇膠序詞拚

岐陽典高岫嶻乃闢

端闕乃升

展宁察案師師徹行楚楚右列作士左班祈父鱗奏  
靈叢鯨鏗猛虞纛俘駢肩逆酋栗股僑榮柴鋤温馬  
釁鼓兩觀必誅三省匪紆慶典誕敷

湛恩式溥復稅農疇緩租國庾化洽橫舍仁周圉圉  
廣青衿員赦滯衣侶

威肅春霆

澤沛夏雨九塞清塵兆人安堵唐平蜀道周省淮浦  
尚誦昌黎猶詩吉甫以今準往瑣瑣何數

天錫

皇帝神聖文武於萬斯年爲天下主

皇上七旬萬壽頌

謹序

英廉

臣

聞星流華渚金天開鳴鳳之祥電繞神樞寶  
錄啟景雲之瑞沐舒長於舜日玉琯常調引仁  
壽於堯年璇圖廣運由來洪算每呈祥於載誕  
之辰厥有貞符恒衍慶於太平之世欽惟我

皇上珠囊協紀金鏡臨宸大範圍而包乾括坤布經  
緯而登三咸五雷霆風雨憲

天成六位之功規矩準繩法

祖纘萬年之緒粵在上章仲秋之吉恭遇

七袞萬壽之辰雲澗星輝川華岳耀開

九重之闐闐普天同上春臺受百祿於共球溥海宏

開

壽宇嘉符疊祝璿璣增紀歲之書福緒長綿金莢衍  
添壽之算遂乃廣敷

愷澤特布恩綸被四表以光華統八紘而煦嫗虞門  
廣闢珊瑚網滄海之珍貢稅普蠲結銓免中邦

之賦凜肺嘉而被濯旨釋雞竿捧粟帛以怙熙  
賚優鳩杖金泥遙逮靈昭岳瀆之神

紫誥分頒

恩及簪纓之族當元日

詔傳三殿十七省之汜濩方深惟

一人道冠百王億萬年之帡幪無外溯自大虹毓慶

早啟祥源洎乎

黃屋膺圖式昭

醜化紹神基於一統橫章縱亥所未周介繁祉於三  
靈邁扈方軒而益上綠圖受學宏敷寶笈之章  
紫極昭文大啟琅函之秘百六部文垂琬璧韻書特  
舉其全五十章義闡苞符樂府載新其舊仿籠  
鵝之妙蹟三希已便於臨池徵涿鹿之遺編五  
卷更傳夫快雪乃以

萬幾之清暇旁求百代之文章四部分題玉軸探  
嬾之富羣書總薈瑤籤搜宛委之珍休哉



文教誕敷赫矣

武功載續拓新疆於萬里草木向榮闢險境於兩川  
風雲聽命算由帷幄畫沙規黑水之疆功定竇  
渝縶矢宴

紫光之閣惟

至仁與

大武故無戰而有征玉壘洗兵已慶貔貅之振旅金  
隄奏績旋看龍馬之呈圖九派旁分竹箭之流

如掌三門遠注桃花之水無波浮五色之榮光  
共仰

一人有慶朝百神子貝闕欣逢二月

時巡當黃流效順之時正

翠輦省方之日蒼龍捧駕紅雲從三輔飛來彩鳳扶  
輪

丹詔自

九天頒下采風詩於南國預儲薇省之才廣雲路於

東膠式煥芹宮之色百萬戶羣稱兕爵慶洽黃  
童四千丈並建魚鱗波澄碧海鏤金檢玉嗤曩  
代之修封雲爛日華慶今茲之介祉所由鵲林  
鰈水並集

光天還令珠絡寶幢咸來福地醍醐遍灑大千生歡  
喜之心蘆葑微聞不二證辟支之果演三車於  
空際看天花到處長春懸卍字於胸前信

壽佛是名無量凡此棧谷梯山之駢至悉徵

延洪納祉之方長於時玉琯凝商珠躔麗極月則旋  
宮隔八日惟積數餘三蒸瑞氣於辰西九和應  
律藹祥光於斗北五緯騰輝香溢絲囊寶甕煥  
吉雲之彩影銜花綬金波涵華魄之光卿烟結  
瑞於輿桓雲旂適駐旭景凝輝於麗正羽仗初  
開集萬國之衣冠合千官而拜舞鵷班鷺序欣  
承

日表以鳴歡玉葉金枝親奉

天顏而祝嘏爰合大酺之樂齊稱  
萬壽之觴惟耆孺咸登於皞熙斯

功德彌昭其巍煥是謂無疆之福允惟有道之長

臣

幸際

盛朝恭逢

聖節厠班聯而舞蹈夙奉

宵衣陳賦頌以敷揚未工簪筆願祝華嵩之

壽用摭葵藿之誠謹拜手稽首而獻頌曰

皇帝大聖經乾緯坤

時幾虔鞏宥密陶甄榮鏡宙合含酥咀醇湛鴻濬漚  
協氣流春

德並

圓燾

功極無垠 一章

重熙慶階

元吉旋履昊歲嚳齡自今以始繹符闡珍輝景飲醴

三辰昭華萬國送喜持照世杯垂

恩錫祉 二章

聖學天縱大文煌煌日月在握雲漢爲章

詔開四庫締帙縹囊百代圭臬六籍笙簧旦復旦兮

天子之光 三章

於昭撻伐威霆化雨奄有萬邦揚我

聖武月支來賓日出奉土揚於

王庭獻其樂舞匪懾以威惟

德之普 四章

帝德如天丕冒惟仁仁育萬物藏富於民

普蠲正賦伊廣及輪迺疆迺理旣耕旣耘康衢作息

浩蕩如春 五章

藹藹吉人

王國之慶甲乙榜開賢才斯盛啗鳳萋梧周雅所咏

百福之宗惟

天子聖人文曰華國圖日鏡 六章



天眷

聖德大河告成南邦於邁時方啟行大吏入奏

皇心以寧載錫之福載展厥誠萬有千歲四海永清

七章

乃乘

靈輅惠此南國爾宅爾田勤爾耕織含甘吮滋詠仁  
蹈德亦有高年載歌

帝力納福祿林躋仁壽域

八章

山莊詠蕩景物華清

天子萬年協氣嘉生中外禔福咏歌太平山岳之

壽億萬之齡泰元神筴以莫不增

九章

皇上七旬萬壽頌

謹序

曹秀先

昊蒼眷佑我

大清全付埏垓式固慶基耿命至於萬億年

皇帝膺大寶命盛德日新福嘏日融總宙天區仁經

義緯漸被變諧普汜於四極四和

乾心弗自暇逸以咸速恒久之道董理

萬幾勗勤加勞宵旰兢業純純常常是以延洪

穹貺

皇慶大來永錫無疆之景算乾隆四十五年歲在上  
章仲秋旬有三日恭逢

萬壽七旬聖節山崇川增時萬時億嘉吉鴻昌合章  
部會元以爲量於時重熙累洽久道化成乾亨  
坤謐六宇騰歡天人訢闔之氣蒸爲泰和九有  
八表棧山梯壑灑灑于于怵蹈交匝轅嘉會而  
慶昌辰衢謳封頌敷天亘地不可殫悉臣竊聞  
泰上成鳩之道用其天曲日術周泊徧照上際

而下究故其治一萬八千歲軒皇御天下提挈  
陰陽襲九竅重九熬經紀萬民故爲百福之所

宗我

皇上知崇效

天夙夜敬止

泰壇

泰折欽崇宗祈報况

躬親所以積和嘉亨而萬福降輯也續承

列聖之丕緒握符闡珍光紹

祖德以修國章而振民隱深惟

乾構難寅承禘祫東西

珠阜展儀祇謁迺

三幸留都晉格於

橋山

周覽瀋遼松杏之間永懷

鴻圖思三功臣之勲而復懿親之功績所以道隆光

紹而弗祿永膺也

疇咨政治疆固精明秉燎求衣

批閱章奏久速之道實與天健同符加以澄敘官方

獎廉黜墨故治臻上理而官吏無敢廢職

惠養下民四海咸喻

親藉以崇本計匡俗以求良法水旱必調俾閭閻日  
益饒裕惟正之供普蠲兩次今者復

諭天下各省漕糧三載輪免蓋藏富於民而納之於

福林壽界也猶復

軫隱下民展義時邁以慰黎元就瞻之願升香於岱  
宗備禮於尼山析津碣石二室五臺八十一車  
之所

莅慶施有加

五巡江浙兩省咸給度支以供帳城次舍却億頓之  
彌文而衛士悉凜程法民瘼吏治靡不章燭以  
節宣庶政問耆艾試翹秀省淹繫截漕舳緩艤



筵

洪綱具舉澤普以周尤以河工海塘爲東南亟務建  
水誌開陶莊引河而黃淮戢鹽官鎮鎖在尖塔  
兩山

親臨指示修固隄堰而杭民之衽席安周頌之詩曰  
懷柔百神及河喬嶽今年春

大駕甫莅豫省河工告戢天人之際感應之速昭瑞  
翁河洵乎降福穰簡之符也

皇上誕敷文德程材擢秀徵鴻辭舉經學春秋試士

特開鄉會

恩科廣

壽考作人之化而熱河又新立學校士習蒸蒸日上  
文治之遠度越前古

詔編四庫全書薈萃古今圖籍彙登冊府排函裝帙  
色備四時建

文淵文源文津三閣以貯之設領閣事直閣事提

舉校理檢閱以掌之  
剴劂聚珍廣惠藝林古未  
之有焉我

朝素嫻騎射故能攻戰必克每歲

舉行圍之典講武習勞以修本務久安長治計深且  
遠用司馬法萃六師以修軍禮四方萬里之外  
莫不震疊於是

聖武遠揚定準噶爾遂克庫車踣阿克蘇略烏什收  
和闐集勲於拔達克山而回部悉平拓地二萬

餘里新疆式闢耕屯商旅與內地等豈惟左右  
哈薩克東西布魯特望風景附最後土爾扈特  
以大濛汗裔自拔羅義挈全部十萬戶口涉遠  
歸順四特咸我臣僕

恩威遐邇綏靖懷柔之偉略豈熊泉丹水所得而擬  
倫者哉兩金川蚩駘結連九姓番落不得晏其  
干闕忘我怙冒恃險不諛是以有蕭斧再舉之  
師五載

握機羣帥受成

鴻勳旣蔽宙台憬喻笮馬巴賓伏皂騰肆偃伯靈臺

萬年不復用矣煒乎煌哉福成之鉅

景命之隆若左券也

臣

又仰窺我

皇上幾餘典學富有

天章樹義典誥之區炳焉與雲漢同昭

御製詩四集洋洋大觀

勤政惠民飭吏陳戒文武經緯以至昆蛟之涵育無

不皆在其中雖覆載苞符化工肖物莫能喻此  
排次一百六韻上陳

列祖創業垂統繼志述事之宏規旁及自堯迄明帝  
王之治忽三致意於敬

天守器範圍廣大至矣茂加

樂府五十篇是非傳實關世道人心匪淺

咏七十二候之月令闢謬砭訛引伸觸類大而課織

劬農精之格物窮理海寓稟朔罔敢差池又授

時之大者 臣 恭繹

聖藻寓意所在

功德繁著斯所以道符休泰化融祉積保定孔固普  
天胥慶也時則班禪額爾德尼遠自痕都斯坦  
之外率其法侶東來祝

嘏雖黃姚玉苞綠圖蘭采詎足方斯瑞應哉然猶  
宸懷冲挹

詔中外臣工勿以慶賀繁文侈陳嵩悃遠近琛賚之

貢却而弗許乃以歲首元辰

紫宸正朝

錫廷臣大宴

頒詔天下溥施

渥恩賚凡二十斂時敷錫仁滂惠浹躋臣民於仁壽

誠非管窺雖指所能一一臚言也

臣

又聞皇之

人多壽今庚子科奉

命主禮部試知各省貢士年七十八十以上者凡三



十餘人

聖駕幸浙時閩中耆儒赴

行在謝

恩者年逾百齡各蒙

寵錫有差臣又以職司宗伯編載紀事用光

盛典顧幸以蒲柳質性時仰霑乎

雨露向日耐秋獲綴班行皆我

皇上天地之德生成並育就舒長於化日扇長養於

仁風

恩深澤久幸至於斯感戴私忱未效萬一頃又陪扈  
山莊鞠脛於芝徑雲坡之下歡忭介景敬願合億  
萬臣民之壽算恭奉爲

聖天子一人必得之壽擬成

萬壽頌一十六章謹拜手稽首以獻曰

皇帝體元乘時建極左繩右規震維乾式時敘九功  
光昭十德聲教風翔遐揚萬國萬國殷昌咸歌

帝力

祺福慶綏京垓萬億

一章

欽崇

蒼昊不冒寰埏絃覆德合

鼎祚慶緜含囊萬物持樞億年武昭參次文象魁前  
角亢暉永卿裔祥連泰元增筴

聖壽齊天

二章

懿樂

皇圖

聖作物覩包項駕軒紹堯纘禹蕩蕩巍巍道隆繩

武大禮本仁虔禋嚴

祖

躬履上都載

巡畿輔祇謁頻仍法守

御宇

三章

聖治備矣化洽羣生懸箴勗吏徧德利氓龍田屬序

祈穀勸耕入蠶春獻萬寶秋成玉條訟息金鏡風行

皇心軫廛提象昇平

四章

道暢儒宮負輪廡序

頌以敦彞易以黃瓦拜孔揖顏三雍春瀉凡我士林  
咸歸陶冶拔擢梗楠稟酌經雅立學灤京

敷文函夏

五章

竦戎示禮秋

御上蘭虞旗獵碣羽仗朱竿歆山竟埜麟鹿弋鸞和

門肅肅勁旅桓桓歲勤

瑯軫永建治安騶虞表貺蕙圃流歡

六章

偉伐花門全平葱嶺黑水淬鋒金墉拓境

睿斷默成洞燭要領鑿空不到皆我邑井衛拉舊藩  
攜孥投請

天德并包戎亭息警

七章

桃關青徼柵鼓申威舐鎗丐息隸戶九圍豈圖氛霧  
礪箐紛飛天彭再出井鉞兩麾九天九地勲集

神幾丹青

紫閣褒鄂流徽

入章

聖學高深

丹毫揆麗韜映賡颺發揮繩契星漢華敷琳琅玉綴  
麋塵訂譌月露屏細茹古涵今發凡起例紉緞中天

焯煌

睿製

九章

禹編綠字堯錄丹書班志劉畧稷下虞初縹緗孔備

架軸攸儲裝黃牙玉校勘虎魚建崇秘閣典重石渠  
藝林美富

乙覽幾餘

十章

迺莅岱嵩禮崇喬嶽爰至五巒花承

黃屋

藻舟津門春柳濯濯魯殿金絲孔壇禮樂

降輦展儀百氏蹤卓設教觀風旣優旣渥

十一章

巡方法



祖五舉

南巡大丙弭節天乙夾輪海隅江甸

觀此下民毋煩供頓毋獻賚珍行慶施惠以綏兆人

斗車所指吳會登春

十二章

河濬九岐海澄百谷上戢星源下維坤軸修築金隄

灑沉禹服

指畫周詳平成迓福溟渤安瀾東南戢穀五色榮光

呈祥經瀆

十三章

上章紀歲留熟司秋歡騰華祝福衍箕疇

一人有慶百祿是道

天膏所沛地負咸周恭銜

鳳綽靡澤匪優升恒曼羨永固金甌

十四章

八部天龍皆大歡喜驚嶺遠來祝

聖天子合爪右肩

覲顏天咫貝葉珠函讚宣

蕃祉駐景金輪騰華寶璽

壽量綿長恒沙爲紀

十五章

猗歟

帝德鼎業大光皇兮

聖治

寶祚永昌祥源福緒受

天之慶金枝四世環介

壽觴臣民忭頌祝

嘏延長四海來賀

萬壽無疆 十六章

皇上七旬萬壽頌

謹序

翁方綱

臣謹言臣竊博稽符應之原深惟德福相因之

旨肇自邃古以來積厚者基崇施博者祐備然  
詩書所載天人相與之際莫不本於實心實政  
以凝命緝嘏上下一貫理可賅券者已若乃至  
誠無息之體博厚高明悠久之用功揆發育動  
叶造化蓋非尋常擬議摹繪所能幾也欽惟  
皇上至德健行聖謨廣運以久照久成之道備貞恒

貞一之規敬

天法

祖仁民勤政文治懋昭武功遠暢垓埏博洽中外禋  
福矣茲者上章紀幹含蓂叶歲恭逢

皇上七旬萬壽之辰金風正秋萬寶兌說山崇海涵  
衆瑞來告而

湛恩汪洋覃敷廣被

錫賚便蕃逾邕以茂

普免各省漕糧以裕蓋藏

開恩科鄉會試以廣作育元辰

詔下自山川百神以逮有司秩典無不式煥式修自  
內外庶僚以逮童叟編氓無不加養加惠惟

聖祐與日俱崇惟

聖澤與時俱增

德已厚而益俾單厚

仁已深而益俾湛深以篤邦治以敬人事以答

乾賦以

錫時福上際

蒼穹中暨嶽瀆下逮含生負性之倫歡洽如一家而  
嚙嚙長春彌多受祉當斯時也耕鑿之聲咸合  
頌詩轍鐸之響皆中鍾呂山呼之音氣屬於星  
雲沉液之光下凝於竹木臣嘗誦詩天保之三  
章其箋傳曰福祿委積高大而萬物所受皆增  
多也又春秋運斗樞曰人主合天履中其施光



明煌煌盛美也洪惟我

皇上敷暢衆福而握釐闡符咸本於執中之義書洪  
範正義曰人君立大中之道以聚福也以

聖德則貫六經以

聖學則綜千聖卽以四庫之藏遠賅劉荀著錄之全  
直啟河洛宛委之蘊

秘閣牙籤

天題

宸鑒則叢雲之輿詞帝鴻之墨海也康功田功屢宣

布於

六飛時邁而刊山滌源

咨茹咨乂又萬福所攸同也

臣竊恭繹

聖德用中之實仰稽

聖學之精

聖澤之溥以推致福之本庶異乎侈陳祥嘏之詞而

猶未足以究闡

高深于萬一也謹拜手稽首而獻頌曰

皇建時福

皇建時中福源之滙建中攸崇緝熙精一蘊乎

宸衷夙夜醴粹慶熾而豐動叶規尺靜含律筩萬化  
之根太和所充運乎斗樞岱恒華嵩沛乎衢尊露雷  
雨風奕奕延長邕邕棣通萬祥斯合萬祐斯同

一章

撰與

天合

祐維

天申淵穆惟肖虔恭惟寅普汜利智暗和配仁景慶  
四扇綢緼化醇茁暢發生物遍以均八表熙陽四序  
長春

聖人行健功在撫辰

聖人錫慶政在養民油油甘膏萃息日新羣方欣悅

一氣鴻鈞

二章

化國延祥日晷最長

聖體

天道積以盛陽

聖勤于上暄潤雨暘民樂於下樵牧耕桑政以時順  
令偕序康山川納祿璣衡效光六幕表裏煥乎咸章  
五行玉燭五緯珠囊惟

聖絜之衆釐提綱壺中躔度浩不可量

錫祉錫羨舒緩滂洋萬國經緯百度貞常一意同欲  
引養益昌

聖德之叶

聖祐之慶

三章

萬方呼嵩喜氣四通環向

楓宸上徹

昊穹

昊穹之祐

帝德之豐是煦是積  
霜雲祥風風雲寫慶  
海岳燦容均鍾之玉  
候律之銅延世曼壽  
萬彙合同而人不知

遊于氣中鼓鬯元化穆穆雍雍濮鈇祝栗暨訖西東  
照景飲醴罔不協從八極星辰普慶

併懽

四章

澤久益長仁增益高智臨義鬯益載以膏以咎

天貺貺益用饒漕糧普免七省停艘藏富於民

惠遍衡茅賦蠲而盈倉箱厚邀萬里歡聲海浦江潮  
爰以履端

詔下慶霄官司軍民黃髮垂髻帛粟糗糧

寵賚齊叨核田豁糧修路葺橋推

恩晉

綽更遍庶僚維春之祺暢乎宣昭紅雲高捧喜徹

雲韶

五章

帝攄鴻藻用信景鑠英莖承雲律函橐籥光並羲娥  
峻逾岱霍薰琴椒張穗篆絳絡

寶思神襟造化所託是以

念祐式叶時若



丹函翠蘊千聖攸度大哉

奎文宏開祕閣先天生一太極參錯更萬萬卷沐浴  
筆削

玉字金聲高懸鐘鐸開闢萬古鎔液七畧普照藝林  
歡忭騰躍珊瑚網大啟泮芹思樂栖梧噦岡鳳皇金爵

敷天瑞氣歌舞鸞鶴

六章

昇平令序中天普慶燕喜同春祥風叶

聖銅渾圓規辰游晶瑩

帝臨道光斗樞福柄列宿之舍比次順令益地之圖  
循軌得正高深合照動植遂性加以屢豐布之農政  
百穀大享萬寶連亘秉穗相遺倉箱互映民氣愷樂  
積而充盛草樹光燁禽魚游泳光天之下善氣所迎  
表海一色粹乎瑩淨是大歡豫是真瑞應凡厥受釐  
偕來合併九有熙恬八方舞詠六合開朗十洲澄鏡  
七章

瑞靄雲蒸南極觚稜元辰

錫宴

天沛瓊漿五行之醞五穀之精五色雲腴來拱

闕廷更合金雞以叶丹冀西顛沆碭萬物由庚幹支  
相輔得氣孳萌百昌鬯達積高而增

山莊高做萬峯下凭

福地之瞻

天近

日升七十二景林巒茂承秋光一碧祥烟萬層近挹

九松山名可徵龍鱗鶴骨蜿蜒峻嶒周雅九如摹繪  
升恆未若真境備

祐是膺

帝澤用釐

帝詩用賡萬景

天開萬祐

天成

入章

福厚之基其實爲田

仁瑞之澤其凝如淵延喜之玉疊篆琅鏞仁壽之鏡  
四照花懸九光之芝枝蔓葉駢萬年之樹日暖風暄  
翠柏露漿不泄而濺玉甕醴泉不汲而湍四百甲子  
絳縣胥延八千春秋大椿胥綿四瀆百谷同會福川  
千巖萬岫同祝南山與道同貞

契道之先與

天同久惟

德應

天道洽永永貞符乾乾

錫疇錫福千億萬年

九章